

四庫全書

經部

欽定四庫全書

春秋集註卷三十四

宋 高閌 撰

昭公四

二十有一年春王正月葬蔡平公

因魯往會而著其臣子私謚之罪

夏晉侯使士鞅來聘

晉頃公即位六年矣公以晉昭見止之故不復往朝

今使士鞅來聘而孫叔姁為政季孫欲惡于晉乃使有司從齊鮑國之禮士鞅怒曰鮑國之位下其國小而使鞅從其牢是卑敝邑也將復諸寡君二十三年晉人遂執姁夫惟禮可以定國而賓客牢禮不以命則長此安窮吳徵百牢自歸費始亂生于交際之間禮好不結而財求無度則聘義亡矣蓋自是聘不復志也

宋華亥向寧華定自陳入于宋南里以叛

去冬三卿出奔陳既出則義與君絕今乃同入于南里是犯君也犯君當誅宋公不能討之而南里之人又不能為君絕之反為三子所據則是宋之綱紀盡弛矣書自陳者陳有奉焉故也

秋七月壬午朔日有食之

日食雖有常度亦人事所召有食之者

八月乙亥叔輒卒

事業無見于經而卒之者為叔肸崇也

冬蔡侯朱出奔楚

朱立已踰年矣而隱世子有之子東國以世嫡之故
攻朱而自立故朱出奔楚以其不正不能自固其位
故稱名以絕之

公如晉至河乃復

公以士鞅來聘故往朝之而晉復辭公故復凡公如
晉而復者六蓋魯衰而朝于齊晉晉愈強則其往也
愈數及其又強而魯益衰則往而辭焉春秋蓋傷魯

之削也滋甚而不能以義自強爾

二十有二年春齊侯伐莒

齊北郭啓帥師伐莒莒敗齊師于壽餘于是齊侯親
伐之莒子行成焉盟莒子于稷門之外夫齊景矜而
自功如此安能及遠哉

宋華亥向寧華定自宋南里出奔楚

大蒐于昌間

三家卒徒至是益衆故于蒐復加大字所以甚三家

卷三十四
之盛所以見公室之卑也昌間言非其地

夏四月乙丑天王崩

景王在位二十五年世子壽蚤卒愛子朝而欲立之
國人弗順乃立子猛

六月叔鞅如京師葬景王

天子崩天下諸侯九夷八蠻莫不奔其喪故七月而
葬者盡天下臣子之心使遠近得會其葬也今天王
崩諸侯無一奔喪者昭公但使叔鞅往會之又以三

月而葬是天子而用士庶人之禮也凡言葬王則知往京師矣必曰如京師者別乎以自行爲文者也

王室亂

春秋記事必指其實下書王猛子朝之事自足以見王室之亂而聖人乃于此不隱其辭直云爾何哉前此者王室衰微猶未至于亂也故聖人每扶而尊之言王則曰天王不混稱于吳楚也言周則曰京師不下同于列國也王敗于鄭而書蔡人衛人陳人從王

伐鄭以諸侯不可敵王故以自敗為文也以至襄王
出奔而書天王出居于鄭晉侯召王而書天王狩于
河陽王臣雖微者亦序于諸侯之上則所以嚴其名
分者至矣故凡王室可譏可貶者皆遷就其辭而為
之隱避今景王不能正其家而致諸子之爭立于是
尹氏召伯毛伯欲立王子朝而劉子單子欲立王猛
二子相爭遂以干戈相向迭勝迭負五年之間國無
定主王室之亂莫此為甚故特書之然莊二十年惠

王有子頽之亂僖二十四年襄王有子帶之亂春秋
不書王室亂何獨于此乎書惠襄二王亂不在己今
景王之亂乃自取之是王室自亂蓋有甚于惠襄者
且天下不可一日無君而二子爭立五年始定嗚呼
王室者諸夏之本也枝葉未有害本實先撥詩人尚
以為戒況枝葉已彫瘁而本又蠹壞若此乎聖人于
此所以特書王室亂者深悼周之不復興且罪諸侯
之不一救也

劉子單子以王猛居于皇

猛悼王也子朝乃猛之庶兄有寵于景王王欲立之
劉單不可故景王崩既葬而子朝遂作亂也以王猛
居于皇者避子朝也以者行其意也貴則行乎賤大
則行乎小此君臣也而以行其意言者君昏不能正
國危不能正亂而後謀之猶行其意也蓋猛位未定
進退在二子見景王不早定以致二子敢專之也皇
者畿內之邑不言出而言居者猛所得有也未踰年

而稱王亦當立也其名之明雖有當立之義未能自定也君前臣名劉單不名而王名不嫌于倒置乎曰君前臣名常禮也禮當其變臣有不名而名其君不嫌者矣惟可與權者能變而不越乎中

秋劉子單子以王猛入于王城

王城者天子西都非宗廟所在而子朝之黨在焉故言入景王失道不能蚤正王猛之位終致子朝爭立故二子既以王猛居于皇又以王猛入于王城再書

劉子單子以王猛其辭繁而不殺則必有大美惡焉
冬十月王子猛卒

居喪而稱王者明當嗣也出而言居者如成君也卒
而書子猛者蓋生已正其當王故死以未踰年之君
書之也不崩不葬降成君也按子朝告諸侯之辭曰
穆后及太子壽早夭即世劉單贊私立少以間王室
夫猛者太子之母弟雖與朝皆景王子猛幼而嫡朝
庶而長而子朝之言乃惟太子為嫡而已欲以長奪

之豈知太子之母弟亦嫡乎凡立後之法先立嫡無
嫡則立子爾立嫡者以嫡為重故太子死立嫡孫未
有嫡孫則立太子之母弟以母嫡故也立子則從諸
子之長者立之均吾庶子故也今猛又卒于是又立
猛之母弟王子匄是為敬王

十有二月癸酉朔日有食之

杜預曰以長歷推校前後當為癸卯朔蓋癸酉篆相
類而誤也夫日食雖有常度亦人事所召有食之者

二十有三年

敬王即位

春王正月叔孫婁如晉

邾人城翼師自武城還魯人譎而取之邾人愬于晉
晉人來討故叔孫婁如晉也

癸丑叔鞅卒

晉人執我行人叔孫婁

晉人以我取邾師為罪而執我行人然此非大怨也

其實則為二十一年士鞅來聘以魯為卑已故也

晉人圍郊

郊王畿之邑不繫之國者天下皆王土也王臣亦無所繫蓋土無二王所以別異于諸侯也春秋諸侯更相侵伐未嘗敢及于周蓋外相攻奪以傾天下之勢其心實無王而內不敢犯王室者懼天下諸侯執言而攻已也此圍郊者子朝在焉故也晉人助王以討子朝之亂既不書大夫之名不稱師而曰人者微之

也事不克濟無功而還勤王之舉果如是乎故書晉人圍郊以罪之

夏六月蔡侯東國卒于楚

前年蔡侯朱來奔楚而東國以世子之嫡遂自立楚人直朱而召東國東國因朝于楚而卒故貶而不葬凡立三年其弟申立

秋七月莒子庚興來奔

庚興奪正而立又不安其國而出奔于魯如匹夫之

逃故稱名與鄭伯突同莒人後迎郊公為君

戊辰吳敗頓胡沈蔡陳許之師于雞父胡子髡沈子逞
滅獲陳夏齧

此見吳之強而楚人益弱故先貶吳以抑其橫夫頓
胡沈蔡陳許皆楚與國也吳伐州來楚人帥六國之
師救之于是吳人禦之盡敗其師于雞父凡直以敗
為文者不分君臣舉師為重然此六國之師亦皆略
而不敘也頓胡沈則其君自將蔡陳許則大夫帥師

是以其次如此也然不書楚而舉六國不君不大夫者是時中國有子朝之難而諸侯安然不救乃助楚以攻吳聖人賤其背華而即夷故併罪六國有同夷狄以夷狄敗夷狄則楚尤不足道也終君之終大夫之者滅獲也其言胡子髡沈子逞滅者深惡二國之君不以禮義自守而服屬於楚為吳所敗不得其死故以自滅為文也若死而云滅者小國悉師而行一敗而俱亡之辭也故鄭棄其師齊人殲于遂梁亡胡

子髡沈子逞滅皆自取之也陳夏齧不言執而言獲者甚之也夫六國之師盡為晉所敗二君見殺一大夫見獲背華而即夷者其效如此此萬世人君之戒是以謹而日之

天王居于狄泉

著有天子也然猛之母弟始立而遽稱天王者蓋景王之崩踰年矣曠年不可以無君故踰年則稱之且明正也又以著天下已有主而子朝不可亂之也其

曰居于狄泉者復避子朝且罪諸侯不赴難也狄泉在王城之側周墓所在也

尹氏立王子朝

以諸侯不勤王王師不勝嗣君出居于狄泉故尹氏立王子朝立者篡辭蓋嗣子有常位故不言立此言立者與衛人立晉同然衛稱人者衆人同欲立之也合衆人所同願猶且不可今尹氏以一己之私而立之以致周室之亂罪在尹氏也尹氏即尹子此稱氏

者著其世執國柄也然衛人立公子晉祇稱晉而已
此稱王子朝何也不稱王子則嫌若尹氏之朝異乎
衛之晉也文勢當然

八月乙未地震

地道安靜以震為異當是之時禍亂極矣日至三食
地為再動

冬公如晉

為叔孫婼故也

至河有疾乃復

公兩朝晉而一見止五如晉而四不得入惟此有疾而復然猶書乃者蓋難辭也逮于有疾乃復爾殺恥也然公之進退得以自專因疾而還可得言之若夫大夫則不得廢君命疾不可書書之是許其復也故公子遂至黃有疾乃復卒于垂不言有疾也

二十有四年春王二月丙戌仲孫貜卒

此孟獻子之曾孫孟僖子也初公如楚僖子為介不

能相儀及楚又不能答郊勞僖子病之乃講學焉苟
能禮者從之及其將死也召其大夫曰禮人之幹也
屬說與何忌于夫子而師事之而學禮焉以定其位
故孟懿子何忌南宮敬叔說皆師事仲尼仲尼曰能
補過者君子也詩曰君子是則是效孟僖子可則效
矣

叔孫婁至自晉

夏五月乙未朔日有食之

日食雖有常度亦人事所召有食之者

秋八月大雩

因旱祭志僭也

丁酉杞伯郁釐卒

冬吳滅巢

巢楚邑襄二十五年吳子遏伐楚門于巢巢人射而殺之至是吳因兩女子爭桑相攻遂舉兵肆其毒于巢而盡殺之故書滅與州來同

葬杞平公

因魯往會而著其臣子私謚之罪

二十有五年春叔孫婁如宋

媾之聘宋且為季氏逆女也書之以見宋曲棘之役
不忘敦篤于急難者以此

夏叔詣會晉趙鞅宋樂大心衛北宮喜鄭游吉曹人邾
人滕人薛人小邾人于黃父

謀王室也自二十二年景王崩王室亂天王播越在

外諸侯皆莫奔救四年之後晉始為此會而諸侯不至但合諸侯大夫以謀之令諸大夫具戍曰明年將納王夫王室之急如此豈可坐待明年哉然則諸侯不行無安輔王室之心可知矣然而此會諸侯猶有善意也故無貶辭惟書諸國大夫見諸侯之無霸也叔孫昭子曰諸侯之無霸也害哉季世之事豈特諸侯以為害王室實下賴霸者亦有望焉且王室之亂如此之甚有霸者作苟能舉法以定之如齊桓公盟

首止以定王世子鄭晉文公誅叔帶以入襄王豈不
美哉桓文不作朝猛相競王室世臣不能明先王一
定之制順非而廢嫡使頃公而為桓文果至是乎是
以聖人傷王室之亂而又于此著諸侯之無霸也

有鸛鵒來巢

劉向曰有蜚有蜮不言來者氣所生所謂書也鸛鵒
言來者氣所致所謂祥也鸛鵒雖飛禽多穴居窟中
或在枯木之竅此非結巢也今云來巢亦異矣先儒

以為非中國之禽則非也攷工記又從而和之曰鸛
鵒不踰濟以今觀之鸛鵒所在有之爾彼殆不知聖
人所書之意而強為之說也傳曰楚幕有烏楚師其
遁又曰城上有烏齊師其遁蓋禽鳥所集必于無人
之處今魯之國政出于三家人皆歸之而昭公孤立
于朝又不安其國數欲如晉故魯之公室荒涼寂靜
閒若無人將為丘墟而鸛鵒以穴處之禽亦來巢也
如高宗彤日之書有飛雉升鼎耳而雊諸儒妄推五

事不修之驗符于災異之說亦非也高宗祭祀特豐于禰宮而簡于祖廟故既祭成湯之後明日將繹而祖廟之中已絕人迹有飛雉升鼎耳而雒焉所以祖已訓諸王作高宗彤日之書而特言典祀無豐于昵也

秋七月上辛大雩季辛又雩

早晚太甚因一月再雩而志其僭且數也季辛不言大蒙上文可知也凡雩不日以再雩故曰言上辛季

辛不言辰者不卜故也夫雩不再者也雩而又雩欲聚衆以逐季氏也此昭公之失也昔樊遲從孔子遊于舞雩之下而問崇德修慝辨惑子告之曰善哉問先事後得非崇德歟攻其惡無攻人之惡非修慝歟一朝之忿忘其身以及其親非惑歟蓋指此也

九月己亥公孫于齊次于陽州

公將去季孫意如伐之不克反為季氏所逐其曰孫于齊者臣子不忍斥君之奔也次于陽州者不得入

于齊待命于其境上公為國君而失守社稷既孫于
齊又不得入次于陽州困辱甚矣且魯之失政也數
世矣在易屯之九五曰屯其膏大貞凶蓋當屯之時
居君之位而膏澤不下于民是威權去已也威權去
已而欲驟正之是凶道也昭公徼幸一發而卒于見
逐以死與高貴鄉公無以異焉

齊侯唁公于野井

弔生曰唁唁者安慰之辭若以齊侯之彊自可連諸

侯之勢問季氏之罪以納昭公易為力爾今徒唁之以虛辭相恤而已是匹夫之愛非患難相濟之正也凡唁皆造其所居其曰于野井者齊侯將唁公公自陽州逆之蓋為恭也

冬十月戊辰叔孫婁卒

此豹之子昭子也觀意如之稽顙于昭子叔孫之以逐君責意如其事可見矣而季孫請納公婁遂往告公于齊公許之還既而季孫有異志婁以憂死夫婁

不忍自同于季氏而謀納公正也不忍見欺于季氏而反自殺忠也故娒至自晉先書其姓氏春秋特以死褒娒也其子不敢嗣是曰成子

十有一月己亥宋公佐卒于曲棘

宋公將為公故如晉卒于曲棘蓋已出其國都故書地季孫娶于宋元則宋元意如之外舅也不此之顧而欲求納公是以正倫恤患為心而不匿其私親之惡蓋激于義而發于誠其賢于當時諸侯遠矣故雖

卒于封內特書其地以別之所以罪齊晉失方伯連帥之職無大國字小之義而哀宋公有其志而弗遂也凡立十五年其子欒立是為景公

十有二月齊侯取鄆

前書公孫于齊次于陽州齊侯唁公于野井示昭公于魯未絕也特罪季氏以臣逐君爾此書齊侯取鄆則見公已絕于魯矣鄆魯邑也公不能有而齊侯取以居公此乃所以罪公不能保其社稷而見逐于其

臣也外取邑不書書之未嘗不稱人而獨此稱齊侯者以齊侯不義季氏之強而閔昭公之羈窮也于是取鄆以居公而齊無私焉故春秋與其爵然而齊侯先許公以千社而弗致乃取魯邑以塞前言故書取鄆以罪之嗟乎齊侯若以取鄆之力會諸侯聲季氏逐君之惡討其罪以納公猶反掌爾徒區區取一邑居之見齊侯無意于納公矣公猶不之悟乃居鄆三年以待之及見其終無意然後之晉亦已晚矣

春秋集註卷三十四

欽定四庫全書

春秋集註卷三十五

宋 高閌 撰

昭公五

二十有六年春王正月葬宋元公

三月而葬簡也且魯往會著其臣子私諡之罪

三月公至自齊居于鄆

入魯境故書至猶在外故書地公雖不得至齊然得

見齊侯故書曰至自齊凡公行反而告廟則書至在外雖不告而書至者所以存公也公有朝廷不能居之反為季氏所逐今出居于外又不能告赴于諸侯以誅絕其亂臣賊子但假齊侯之力取鄆而居之亦可憐哉

夏公圍成

春秋未有以兵自圍其國之邑者也成乃吾孟氏之邑而公自圍之若異國然公之失政可知也時齊侯

將納公反惑幸臣之說使公子鉏帥師從公圍成不
書公以齊師伐成者惡齊受季氏之賂而有異志焉
雖得其師不足以也故獨舉公以為重且見國內皆
叛公也嗚呼君失國臣叛君春秋書公圍成而意在
是矣

秋公會齊侯莒子邾子杞伯盟于鄆陵

公失國而會諸侯者何求入也求入不能主晉而主
齊故齊侯矯為此盟以莒邾杞皆魯之與國故也惟

齊侯不信雖謀納公而不能是以此盟不日不月不為信辭也

公至自會居于郚

以會致者見魯之臣子以諸侯欲謀納公不急助之反使吾君棲棲然復居于郚也

九月庚申楚子居卒

楚平王也立十三年其子軫立楚子卒義見宣十八年

冬十月天王入于成周

尹氏召伯毛伯以王子朝奔楚

立王子朝獨書尹氏而奔楚并舉召伯毛伯者明罪
本于尹氏先治其逆首而後治其從也二十三年先
書天王居于狄泉而後書尹氏立王子朝此年先書
天王入于成周而後書子朝奔楚者由嗣君不自正
故亂臣得以乘之及能反正然後罪人竄迹皆上之
人有以名之也書奔楚者見天王之令不行于天下

故逋逃罪戾之人楚敢受之而不歸也

二十有七年春公如齊

公至自齊居于鄆

公至自齊居于鄆者二至自會居于鄆者一至自乾
侯居于鄆者一書至書居不外公也我君故也君播
越于外不得其所而魯國臣子之義可絕乎春秋之
作明君臣也君臣之義明而天下安且治矣

夏四月吳弑其君僚

此公子光弑之也吳王壽夢四子長曰諸樊次曰餘祭次曰夷昧次曰季札季札賢欲立之札不可于是兄弟更將以次傳國于季札季札終辭不立則諸樊之子光以嫡孫當立而夷昧之子僚乃以父故遂繼立焉于是光弑之而立也不直書光弑者光既以嫡孫嗣立故舉國以弑舉國則光罪在其中矣然則春秋不專罪光乎曰季子之言春秋之旨也季子曰爾殺吾兄吾又殺爾是父子兄弟相殺終無已也聖人

度義之輕重與時推移故湯武之事不以為非然有
湯武之志則可也或曰光之志亦可取乎曰篡已成
矣春秋成其為君爾猶齊桓晉文本志豈專為天下
哉然功及于天下故聖人成其為霸光愈于篡而亂
國者也桓文愈于不善而無功者也春秋彼善于此
則取之爾

楚殺其大夫卻宛

卻宛直而和國人說之費無極譖于令尹子常而殺

之以其君不明故臣得以專其威以至殺其大夫而莫之止故舉國以殺義見僖二十八年

秋晉士鞅宋樂祁犁衛北宮喜曹人邾人勝人會于扈此會本于戍周也戍周者以朝在楚故也而魯卿不會者諸國因謀納公故也晉人取貨于季氏遂弗克納而此會具書卿名者不可以不克納公之故以掩其謀戍周之善故錄之亦以見諸侯大夫皆專權無君與季孫意如等爾

冬十月曹伯午卒

曹悼公立九年其弟野立是為聲公

邾快來奔

快之書亦三叛人之黨魯為逋逃之藪而受之豈所以為訓也此魯之彊臣所以逐君也逐君而邾快來奔各從其類也

公如齊

復自郚行

公至自齊居于郕

齊侯飲公酒使宰獻而請安公以齊之卑我也遂歸而明年如晉據范獻子之言曰季氏有齊楚之助然則齊固助季氏安肯納公

二十有八年春王三月葬曹悼公

六月而葬簡也且著其臣子私諡之罪

公如晉次于乾侯

公之奔也不知先如晉而連年如齊皆不見禮乃始

如晉此晉所以不納公也次于乾侯者以不得入于晉次于晉境而已公之失所益甚矣

夏四月丙戌鄭伯寧卒

鄭定公立十六年其子蠆立是為獻公

六月葬鄭定公

三月而葬簡也且著其臣子私諡之罪

秋七月癸巳滕子寧卒

滕悼公立二十五年其子結立是為頃公

冬葬滕悼公

因魯往會而著其臣子私諡之罪且公不在國凡喪葬之禮皆季氏專之也

二十有九年春公至自乾侯居于鄆齊侯使高張來唁公

唁于野井齊地也唁于乾侯晉地也今在鄆乃魯地故但書來而已齊侯今復唁公者以公自鄆如晉而不為晉所納故使高張來唁乃所以嗤公也然此淺

事也而書于經者罪齊侯不修方伯連率之職以討意如之罪也

公如晉次于乾侯

齊侯唁公比公于大夫故公復如晉冀晉見恤也而晉復不受公故次于乾侯在易坎之井曰來之坎坎險且枕入于坎窞勿用此昭公之象也諸侯出奔狼狽未有如公者春秋書公狼狽之甚如此者所以深罪季氏之施惡于公與諸侯之不救也

夏四月庚子叔詣卒

叔詣欲納公而卒季孫意如曰叔詣無病而死此天命無公也非我罪也觀意如此言逆節甚矣宜公之不能忍也

秋七月

一時無事書首月存天道王法也

冬十月鄆潰

此齊侯誘之使潰也所以責鄆也鄆固畏季氏以齊

侯故居而不憚今齊不終惠固不足責而鄆亦不可
潰敗而叛公也雖然君子無入而不自得焉以順民
之心而民自歸之故詩曰在彼無惡在此無讟今昭
公居于國國人逐之出居于鄆適去而鄆潰見魯民
皆叛但知畏季氏而不寧公也故穀梁子曰昭公出
奔民如釋重負聖人書之以為萬世人君之戒

三十年春王正月公在乾侯

在乾侯者以鄆潰故也公出至此五年矣公雖在鄆

猶在魯也自去年鄆潰而公無所歸遂寓于晉而國內闕然無君故每歲于朝正之時書公所在則存君父罪臣子譏諸侯之義皆可見矣

夏六月庚辰晉侯去疾卒

晉頃立十四年卒其子午立是為定公時公在乾侯蓋晉地也而不弔其喪者晉不受故也

秋八月葬晉頃公

三月而葬簡也且著其臣子私諡之罪

冬十有二月吳滅徐徐子章羽奔楚

徐本夷狄自齊桓時自附于中國而爵為子今背華而即夷故楚人以為貳于吳而執之吳人以為貳于楚而滅之夫附中國則與于中國之會盟而附蠻夷則遂至于執其君而滅其國然則附蠻夷者可不戒哉凡國滅君奔不名而徐子獨名者傳以為徐子已服矣後復奔楚以經義攷之為信彼既降于楚矣安有興復之志乎生名之著其絕也

三十有一年春王正月公在乾侯

著公不能外内久失其所魯國闕然無君也乾侯曰
在而鄆曰居者鄆魯地公所有乾侯晉地非公所得
而專也故春秋凡言居者境內之辭如天王出居于
鄭之類是也凡言在者境外之辭如公在楚之類是
也

季孫意如會晉荀躒于適歷

夫晉為盟主不討意如之罪以昭霸討又使其卿與

之會而議納之嗚呼此又何議之有是獎亂臣以安其意也

夏四月丁巳薛伯穀卒

入春秋以來惟莊三十一年書薛伯卒及此始書名
晉侯使荀躒唁公于乾侯

秋葬薛獻公

季氏恐失鄰國之歡故使人會其喪葬

冬黑肱以濫來奔

邾子封黑肱于濫若謂之邾黑肱則邾大夫矣而非也若謂之濫黑肱則濫之君矣亦非也諸侯不得擅相封其籍不通乎天下故謂之黑肱以濫而不繫之邾則見濫已非邾所有矣所以罪邾之專封也三叛人以地來奔皆公不在國季氏受之蓋以類至也十有二月辛亥朔日有食之

日食雖有常度亦人事所召有食之者

三十有二年春王正月公在乾侯

每歲正月必書公所在者不與季氏專正朔也昔唐
沈既濟論史謂武后不當立紀當繫于中宗每歲首
當書帝在房陵然後繫以武后之行事是亦不與武
后專國政得春秋書昭公之旨也

取闕

此承上文言在乾侯之取也闕雖叔孫氏之邑乃魯
羣公之墓所在也公在乾侯使人誘取之而春秋與
外取邑同文者著公在外得邑于季氏猶取而後得

是已絕于魯矣

夏吳代越

前此越與楚子伐吳故吳始用師于越而國自是亡矣

秋七月

一時無事書首月存天道王法也

冬仲孫何忌會晉韓不信齊高張宋仲幾衛世叔申鄭國參曹人莒人薛人杞人小邾人城成周

自子朝之亂諸侯戍周至是王使告于晉請城成周以休諸侯之戍于是何忌往會諸國大夫城之天子有道守在四夷今至于城王都可以不書乎成周乃天子所在而大夫城之曾緣陵之不若故列數大夫所以貶諸侯也孔子曰天下有道則政不在大夫今城成周蓋天子之事也而大夫主之是時天子微諸侯又微故權在大夫也不言城京師而言城成周者不與大夫城京師故以國舉之所以見京師之弱諸

侯大夫之強也申世叔儀之子參子產之子何忌者
孟僖子之子也夫古之人三月無君則弔公之出也
今八年公為旅人而何忌不能從季孫逐君而何忌
不能去雖受晉命城成周然不告于公而自往會之
此實覩文知罪不待貶絕而自見也

十有二月己未公薨于乾侯

昭公自出奔之後如齊如晉次乾侯者再居鄆者四
所以奔走往來于道路中者冀以求納也初魯之臣

亦意其復國故未忍絕之所以待公者猶若在國然
然而齊晉終無意公亦遂絕望自鄆潰之後遂茫然
無所歸因止于乾侯故每歲書公在乾侯以明公內
為強臣所逐外無大援見納卒為旅人死焉薨于乾
侯著不復國也

春秋集註卷三十五

欽定四庫全書

經部

高氏春秋集註卷三十六至

詳校官監察御史臣徐如澍

給事中臣溫常綬覆勘

總校官舉人臣章維桓

校對官員外郎臣金光悌

謄錄監生臣吳裕信

欽定四庫全書

春秋集註卷三十六

定公

元年

公雖卽位在六月然亦統此歲也故卽稱元年不書正月者是時季孫專國昭公薨于乾侯公尚未立國未有君以承正朔故畧而不書所以黜強臣而存公

宋高閔撰

室也

春王三月晉人執宋仲幾于京師

春秋之法諸侯不得專執況大夫乎宋仲幾會城成周乃不受功苟莫之討則諸大夫不聽于一正事不成矣然韓不信不請于天子以陪臣而敢擅執諸侯之大夫于天子之側亦可謂無忌憚矣此履霜之漸故稱人以貶之不言執于成周而曰京師者自諸侯言之以明天子在是也蓋天子所居自諸侯言之則

稱京師魯君臣朝聘皆稱如京師是也自周言之則以地名為別王猛入于王城天王入于成周是也景王以前都王城因謂王城為京師至敬王始都成周則謂成周為京師故諸侯之大夫奉王命而城王都則亦自周而言城成周及晉人不以王命執仲幾于成周則自諸侯而言京師也

夏六月癸亥公之喪至自乾侯

公薨至今半歲餘矣季氏不以國君喪禮迎之者謀

廢公衍公為而立定公故也立衍為則不利于季孫者也是以詳著其日以見魯國臣子忽慢無君之甚
戊辰公即位

凡即位不日此書日者非正月朔旦故也國家不可一日無君昭雖在外猶魯君也自薨至今統紀之絕若是其久也故聖人日以謹之爾季氏既逐其君君薨又不即以國君喪禮迎之今又廢其嫡嗣而專立其弟公子宋宋于授受之際不擇所處污于偽誘于

利昭公喪至五日而殯遂自即位此非受之先君而
專受之意如者也既為意如所立故不復討意如之
罪在易漸之象曰日進得位往有功也進以正可以
正邦也豈有進不以正而能正邦者哉

秋七月癸巳葬我君昭公

昭公薨于外凡半歲餘始以喪歸今歸及周月而遽
葬葬于墓道南是終不同乎先君也見魯之臣子無
恩于先君如此儀容講明日昭此又其臣子私謚也

九月大雩

因旱祭志僭也

立煬宮

昔季氏行父嘗立武宮矣煬公比武宮尤遠蓋伯禽之子廟毀久矣季孫意如之逐君也懼而禱焉昭公薨季氏以為應遂為之立宮蓋季氏用此欺人若曰昭公之死鬼神實貶之也春秋誅其意而微其辭但書立煬宮而季氏行事之迹自可見矣此之謂世濟

其惡也而公從之公之惡可知矣

冬十月隕霜殺菽

建酉之月隕霜殺菽害于民食是異而且災也五行志曰菽草之難殺者也言殺菽則知草皆死矣言不殺草則知菽亦不死也董仲舒以為菽草之強者天意若曰加誅于強臣而殺菽者微見季氏之罰也是時季孫強甚故大雩而隕霜雨暘寒燠為之失序

二年春王正月

一時無事書首月存天道王法也

夏五月壬辰雉門及兩觀災

雉門兩觀皆天子之制也魯僭久矣今天示災故因而著之與郊牛之傷同義所以正天下之大典也然兩觀設于雉門之上但書雉門災則知其及兩觀矣必書及兩觀者所以重著其罪此聖人之深意也

秋楚人伐吳

吳人致楚師來伐已遂敗楚師于豫章但書楚人伐

吳者以囊瓦見誘而敗乃所以惡吳也

冬十月新作雉門及兩觀

莊二十九年新延廡不言作凡言作者改舊制而增大之也魯僭天子之禮天示變以警之今習舊而不知以為非遇災而不知以為戒乃更作而新之反加其度焉是魯之僭竊終無已也聖人特書曰新作重著僭竊之罪自在定公而不在先君也定公覩變而益侈如此無怪乎季氏之脅其主矣此春秋微辭至

意也

三年春王正月公如晉至河乃復

昭公自有嫡嗣而季孫意如上不請于天子乃專立
定公公為逐君者所立聞晉怒而往朝焉晉問其故
且以緩朝見辭是以公臨河而不濟也公之進退皆
失矣故明年因會而請盟于臯鼫也

二月辛卯邾子穿卒

夏四月

一時無事首書月存天道王法也

秋葬邾莊公

七月而葬慢也僭也因魯往會而著其臣子私諡之罪

冬仲孫何忌及邾子盟于拔

春秋之季大國日亢小國日侵兵力勝而禮敬亡故書公如晉至河乃復著晉之輕魯也此書仲孫何忌及邾子盟于拔著魯之輕邾也邾子居喪而以吉禮

與魯大夫盟則其微弱可知義見昭十一年

四年春王二月癸巳陳侯吳卒

陳惠公立二十四年其子卯立是為懷公

三月公會劉子晉侯宋公蔡侯衛侯陳子鄭伯許男曹伯莒子邾子邾子胡子滕子薛伯杞伯小邾子齊國夏于召陵侵楚

入春秋來蔡人首叛中國而附楚至是蔡人不勝楚之凌虐乃使告于諸侯首能伐楚者蔡願為之先鋒

晉侯于是合諸侯于召陵以救蔡伐楚也夫楚恃其
強侵害諸侯晉人上請于天子大合諸侯以伐之而
不能明暴其罪以行天討未及于楚境而還故書會
于召陵侵楚者以見諸侯不振不能救蔡伐楚也卒
使救蔡伐楚之功歸于吳此年冬蔡侯以吳子及楚
人戰于柏舉楚師敗績是也夫晉為盟主大合諸侯
十八國之衆天子使大夫臨之可謂盛矣乃不能攘
夷狄之患而吳以一國之師敗之此見中國衰微之

甚也。召陵近蔡地，會兵于此而欲伐楚，著其師之不進也。故書侵以罪之。是時晉荀寅求貨于蔡，蔡人弗與，遂辭不進。晉是以失諸侯，中國遂大亂。吳子、子黃池之會，自此始也。

夏四月庚辰，蔡公孫姓帥師滅沈。以沈子嘉歸，殺之。沈不與于召陵者，與楚故也。與楚者，不受晉令也。故晉因使蔡滅之。蔡屢為楚所滅，今而舍楚，不易矣。晉侯不能恢宏霸業，求所以服楚而保蔡，從蔡侵楚，固

已失之一沈子不能容而殺之歸惡于蔡是重楚人
怒蔡而易晉爾蔡雖齊桓之世不深即中國非不即
中國也國近楚有畏焉不能保其無他也昭侯毅然
棄之蔡計則失蔡意則可嘉乃復為此舉嗚呼使昭
侯而知保國則必悔之

五月公及諸侯盟于臯鼫

此召陵之諸侯也襄二十五年重邱之盟亦會盟異
處而不言公及此書公及諸侯盟于臯鼫何也公以

不獲見于晉故因會而求盟焉則此盟公意也故特書公及

杞伯成卒于會

不言卒于師者以不成乎伐楚也杞悼公立十二年世子乞立是為隱公七月其弟過弑隱公而自立是為僖公

六月葬陳惠公

此見陳侯背殯出會也蓋君在殯則子辭會可也雖

不得已于晉令而齊亦止使國夏來爾況召陵之後
不成于伐楚是以君子惡之且因魯往會著其臣子
私諡之罪

許遷于容城

自葉遷也至是蓋四遷矣其微弱可知也

秋七月公至自會

晉以伐楚召諸侯而以會致者見不成乎伐也

劉卷卒

召陵會罷而卒則知臯鼫之盟以疾不預也不曰劉
子卷者非列國也先王之制內諸侯祿外諸侯嗣此
三代之禮所最重者也經未有以言之觀乎劉卷卒
則可信矣

葬杞悼公

因魯往會而著其臣子私諡之罪

楚人圍蔡

以召陵之會諸侯見侵且為沈子故也然此楚子也

貶而人之者楚子以一裘之故拘蔡昭三年此無道之甚也然蔡昭惜一裘之微受譖幾死歸而謀伐其不量力亦已甚矣

晉士鞅衛孔圉帥師伐鮮虞

葬劉文公

尹氏王子虎皆不書葬此書葬者以魯方與之會而特往葬之且著其僭也凡大夫卒以字配謚如祭仲夷伯之類是也劉卷雖天子之大夫豈可僭稱公乎

雖天子賜之諡而稱之亦非禮也

冬十有一月庚午蔡侯以吳子及楚人戰于柏舉楚師敗績

春秋摟諸侯以伐諸侯者皆不言以以者彼非起意于用兵而我行其意也楚人圍蔡晉師不出故蔡侯棄晉而求救于吳吳子初立無意用兵而蔡侯以之戰焉遂敗楚師于柏舉柏舉楚地也其不以楚決吳戰者不使楚為主也春秋內諸夏外夷狄故以蔡主

之也稱吳子者善其能佐中國而攘楚也晉合十八國之君不能救蔡伐楚而吳子救之伐之此晉吳之事強弱之勢較然可見自是諸侯大小皆宗于吳矣楚囊瓦出奔鄭

此柏舉之敗將也書奔鄭者罪鄭以中國而主夷狄
奔亡之臣也

庚辰吳入郢

郢本先王之建國而楚之先僻在荆山厥後強大出

并諸侯遂滅郢而都之今吳入楚都而曰入郢者聖人不與楚人之滅郢故因吳人之入而存先王之建國也與詩存卹卹二國之風同意夫吳子救蔡伐楚斯可善矣然而至于入吳則吳之志乃不為蔡也伍子胥復讎之故也舉吳國而為匹復復讎故乘囊瓦之敗長驅入郢君居其君之寢而妻其君之妻大夫居其大夫之寢而妻其大夫之妻聖人又惡其乘人之敗而深為利故反其狄道而稱吳又謹而日之疾

其已甚也夫楚自春秋以來肆禍于中國尤甚觀其恃甲兵之利乘時竊號斥地數千里以吞以噬驅逐迫脅魯衛陳宋蔡許鄭薛之君望風畏威惟其指顧奔走之不暇也齊桓晉文舉中國之衆傾中國之力止能一盟屈完于召陵敗得臣于城濮爾二霸既往天下諸侯莫有能與抗者惟柏舉之戰吳能勝之夫柏舉之戰囊瓦既奔吳人長驅入郢汚其妻夷其宗廟慘不道甚于水火葢爾楚昭僅以自免烈此吳之

盛也自是諸大小罔不俛首與吳為會而中國愈不能抗至于黃池之會吳子主焉而春秋于是乎終矣

五年春王三月辛亥朔日有食之

日食雖有常度亦人事所召有食之者

夏歸粟于蔡

患難相救有無相賙此諸侯之正也春秋之世相攻相滅此道不行矣然當是時諸侯未嘗供職貢于天

子至使天王有求于下國則知夫魯歸蔡粟非濟其難而賙其無也蓋以蔡與吳相援而敗楚入郢故魯畏而賂之所人所以追其意而罪之也

於越入吳

吳在楚故也嗟夫闔閭爭入郢之利而於越入吳夫差取盟晉之功而於越入吳意有所逐而憂有所忘矣是以君子終日行不離輜重惡輕而戒動也按昭五年楚子以諸侯伐吳而越人已見於經至此及十

四年至哀十三年皆書於越何也越人自名曰於越
君子名之越越治國有狀能與中國通則以中國君
子之辭言之治國無狀不能與中國通則以其俗之
辭言之越始稱人以其慕中國之義也改稱於越者
惡之也吳之伐楚有安中國之意而越乃乘其士卒
罷敝掩入其國至十四年又敗吳于槁李哀十三年
又入吳若為楚復讎者是以君子惡之以其本俗之
辭謂之於越與漢書於越同義蓋於于越粵皆發語

辭經書於餘邱亦即其自稱書之也

六月丙申季孫意如卒

此季孫宿之孫悼子紇之子季平子也其子斯嗣是為桓子

秋七月壬子叔孫不敢卒

此叔孫婁之子叔孫成子也無見于經而卒之者著叔孫之有後也子州仇嗣是為武叔

冬晉士鞅帥師圍鮮虞

以四年之伐未得志故也兵益憤義不勝益是以君子惡晉焉

六年

是年冬天王避儋翩之亂處于姑猶而經不書

春王正月癸亥鄭游速帥師滅許以許男斯歸

此見楚之弱也夫鄭許之怨舊矣小大之不侔明矣許人本恃楚以固其國至于四遷而楚不能為之強而鄭游速以偏師一出滅其國而俘其君楚則弱矣

而亦已甚焉者也故謹而日之豈非楚人累敗于吳
故鄭因乘許之微弱而肆其暴耶許男不死于位故
名之

二月公侵鄭

召陵之盟口血未乾而鄭保囊瓦滅許故晉命公興
師而討之以其為晉出師故書侵以罪之是時季孫
斯初嗣卿位陪臣陽虎執國命又迫于晉命進退皆
不由公也

公至自侵鄭

公內有強臣不能討乃為晉討鄭內外結怨危之道也

夏季孫斯仲孫何忌如晉

季孫如晉聘且獻鄭俘陽虎強使仲孫往報夫人之幣夫一卿將命可兼他事豈可每事一卿乎故累數之見二卿為陽虎所制也嗚呼天子微諸侯僭諸侯微大夫凌大夫微陪臣脅理勢然爾

秋晉人執宋行人樂祁犂

祁犂私與趙鞅飲酒范鞅言于晉侯而執之稱行人言不當執也晉自是失諸侯矣

冬城中城

成九年城之矣此復城者三家張矣公之所有者中城而已又外有齊鄭之怨故懼而城焉

季孫斯仲孫忌帥師圍鄆

鄆自昭二十五年齊侯取之以居昭公三十年鄆潰

遂貳于齊至是二卿圍而欲復取之蓋陽虎欲傾季氏以謀政也季仲圍而曰陽虎何哉虎專季氏季氏專魯仲何為哉

春秋集註卷三十六

欽定四庫全書

春秋集註卷三十七

宋 高閌 撰

定公二

七年春王正月

夏四月

兩時無事義見桓九年

秋齊侯鄭伯盟于鹹

二國相約叛晉

齊人執衛行人北宮結以侵衛

以者行其意也齊侯召會于衛衛侯欲叛晉而諸大夫不可乃使北宮結如齊而私于齊侯曰執結以侵我齊侯從之衛遂叛既書行人而又書侵所以著齊侯之奸詐也結稱行人明其叛所當執也夫衛侯欺其羣臣以紿晉殘其百姓以奉齊齊之執結也固為有罪矣而衛之無良又甚焉

齊侯衛侯盟于沙

執其行人而求盟是劫盟也何有于信哉

大雩

因旱祭志僭也

齊國夏帥師伐我西鄙

齊叛晉與鄭盟故為鄭伐我且報二卿之圍鄆也

九月大雩

一時再雩見旱之甚

冬十月

一時無事書首月存天道王法也

八年春王正月公侵齊

公至自侵齊

去年齊伐我西鄙有辭于我也公加兵于齊則無名矣是時魯政不復在公矣而三家者實使公欲歸怨于公故也春秋因而欲見公之舉動書至自侵齊者侵齊本出于三家而三家者欲歸怨于公故未踰時

而致之且為下復侵齊起也

二月公侵齊

三月公至自侵齊

公踰月之間再出侵齊雖三家者之所為然乍來不
得休息見公之進退益不自專矣故兩書侵至以見
之

曹伯露卒

此曹靖公也自曹悼公卒其弟聲公野立五年而其

弟弒聲公而代立是為隱公隱公立四年而其弟露
又弒隱公代立而經不書者習亂故畧之也凡立四
年其子陽立遂為宋所滅

夏齊國夏帥師伐我西鄙

以公不與鹹沙之盟且報此春之再侵也按昭公之
孫也齊雖不克納而有意存之矣定公即位未嘗修
好于齊故齊比伐我而我亦再侵齊觀春秋書齊伐
公侵則其曲直可見矣

公會晉師于瓦

公至自瓦

晉將來救而齊師已退故公出而逆之于瓦瓦衛地也不書救者齊師先自退不因晉救之至也不以會致者公非出會也

秋七月戊辰陳侯柳卒

晉士鞅帥師侵鄭遂侵衛

鄭伯與齊為鹹之盟衛侯與齊為沙之盟二國皆為

齊而叛晉晉以是先侵鄭復侵衛所以絕齊之與國也夫晉不聲其罪以行天討而士鞅專用其兵又不能取服故兩書侵以罪之

葬曹靖公

因魯往會而著其臣子私謚之罪

九月葬陳懷公

此特書月又著其簡

季孫斯仲孫何忌帥師侵衛

為晉伐也以其為晉興師故書侵

冬衛侯鄭伯盟于曲濮

結盟叛晉也去年公侵鄭今年二卿侵衛皆為晉故而士鞅又自帥師侵之故二君同為此盟以固其謀從祀先公

從順也不曰順者其事順其意則非故變其辭曰從也夫魯祀之不順多矣武公燭公在所當祀僖公閔公在所當正昭公則又當祀而不祀者也今當稱先

公則盡從典禮不止為一公設也然不舉所祀之名
不指所祀之所者非時妄祀其事可醜出于陽虎之
矯舉故雖禮之復正者而聖人實書之在盜竊寶玉
大弓之上所以誅陽虎之亂也當是時魯國之政季
氏專之季氏之室陽虎有之魯之君臣拱手聽命無
敢誰何此孔子所以歎陪臣執國命而知三桓之子
孫微矣彼陽虎所以濟其奸謀者必有所挾故因人
之所欲者而假譽焉以魯祀之不順久矣舉國之人

皆以為非然百餘年間莫或釐正陽虎一旦去之自
謂足以借譽于國人而已因得以肆其亂是為小正
以售其大不正立小義以遂其大不義是虎之謀去
三桓意若可善而其事則亂也其祀雖順而非所當
祀也夫祀者國之大事而亂臣賊子得以專其廢舉
處其升降聖人但書從祀先公而意皆可見矣所謂
定哀多微亂者意在言外也嗚呼千載之下奸偽之
迹禍亂之變彼得假託以濟其私者豈特一陽虎而

已哉宜聖人之丁寧如此

盜竊寶玉大弓

明堂位以大璜為天子之器大弓為天子之戎器蓋
成王以是賜魯是先君之分器也周官天府之職掌
祖廟之守藏與其禁令凡國之玉鎮大寶器藏焉若
有大祭則出而陳之既事藏之然則寶玉大弓宜藏
之祖廟有禁令焉今因從祀先公出而陳之遂為盜
所竊則國亂無政可知矣是時公室卑三桓弱陽虎

以陪臣執國命將殺季桓子不勝而出故因從祀先
公竊取寶玉大弓以行聖人以國之分器藏在宗廟
非陽虎所宜有又不欲陪臣得奪而莫有抗之者故
書曰盜竊凡盜竊者人皆可得而執之也

九年春王正月

一時無事書首月存天道王法也

夏四月戊申鄭伯蠆卒

鄭獻公立十三年卒其子勝立是為聲公

得寶玉大弓

陽虎徐思其不義又國之分器無益于用故使來歸之以解衆也若實書盜歸寶玉大弓則是見盜不禽非復成國故祇書得寶玉大弓以見器之空還而不獲盜者以正典刑則亦幸而得之爾盜竊之罪于誰責而可乎

六月葬鄭獻公

三月而葬簡也因魯往會而著其臣子私謚之罪

秋齊侯衛侯次于五氏

據左氏則是齊衛二君同伐晉也而書曰次者春秋傷中國之衰而存盟主也王道廢則存王霸業替則存霸公室微則存公此春秋撥亂之志也是以春秋之初不書伐王春秋之季不書伐霸至是知晉之不足與而齊衛二君未可以深罪也故稱其爵

秦伯卒

冬葬秦哀公

秦哀公立三十六年世子蚤卒乃立世子之子是為
惠公因魯往會而著其臣子私謚之罪

十年春王三月及齊平

魯與齊平故書及蓋平八年再侵齊之怨也然則魯
已叛晉矣孔子何為相之耶曰是時晉已不能主諸
侯矣孔子曰如有用我者期月而已可也三年有成
此可以有為之時也而孔子已用于魯務崇德矣與
大國為鄰而連兵不已則無以崇德故與齊平然後

國可以靖而文德以修也

夏公會齊侯于夾谷

及齊平故也以傳攷之夾谷實盟而齊侯使萊人劫焉非義也是以微之不忘于經也

公至自夾谷

夾谷之會齊侯使萊人以兵劫故書至以危之

晉趙鞅帥師圍衛

報五氏之師也

齊人來歸鄆讎龜陰田

夾谷之會孔子相焉以禮卻齊齊人愧服故歸三邑以謝此服義而來歸之故書來歸蓋其致之有禮文故也鄆自昭二十五年齊侯取之以居昭公尋自有之讎龜陰亦魯田始失不書義見哀八年夫孔子夾谷之事人可能也而使大國失守悔過效順所不能也此修誠之至崇德之素感于其人之天譬如干羽格有苗非任智者所能測也揚子曰孔子用于魯

齊人章章歸其侵疆惜乎魯不能終用之

叔孫州仇仲孫何忌帥師圍郕

秋叔孫州仇仲孫何忌帥師圍郕

郕叔孫氏邑也公若藐為郕宰州仇有怨于藐使其
馬正侯犯殺之不能又使其圉人殺藐故犯懼而以
郕叛書二卿師師圍郕著家臣專有大夫之邑也家
臣專大夫此所謂出乎爾者反乎爾者也孔子曰天
下有道則禮樂征伐自天子出天下無道則禮樂征

伐自諸侯出自諸侯出十世希不失矣自大夫出五世希不失矣陪臣執國命三世希不失矣又曰祿之去公室五世矣政逮于大夫四世矣故夫三桓之子孫微矣自隱至昭十世而季孫意如逐昭公自季文子至桓子五世而陽虎遂囚桓子陽虎事季平子至囚桓子不克而亡歷昭定纔二世而孔子有十世五世三世之辨者蓋以魯約之而已非專指魯也自公室而言則宣至定為五世自大夫而言則文子至桓

子為四世言三桓之子孫而不言陪臣者蓋孔子所致意以戒者尤在公室而不在大夫故再見之皆據春秋而言也二卿帥師圍郕而不服卒用反間以出叛人而後國安于此見孔子雖未去司寇已弗用矣故再書帥師圍邑帥師圍之弗勝所以著家隸之強國政絀也不書齊之致師者弗子齊致也

宋樂大心出奔曹

樂祁犂死于晉晉人止其喪以求成于宋宋使樂大

心盟晉且逆祁犁之喪大心偽辭疾于是祁犁之子訴于宋公而逐之故以自奔為文然辭使非大譴而讒言乘之罪累上矣

宋公子地出奔陳

宋公奪地之馬以與向魋地乃扶魋而奪之公弟辰使地出境以為君禮于是奔陳而公弗止焉不書弟者罪不專在兄也

冬齊侯衛侯鄭游速會于安甫

三國皆叛晉而會于此者蓋結謀也晉德之衰可知矣然春秋卒為晉諱者以齊景公不足以定霸故也非王道成不易王非霸道立不易霸此春秋所以定天下之定也霸統在晉已久久則難承矣聖人不忍輕絕之也

叔孫州仇如齊

夾谷之會歸我鄆謹龜陰由侯犯以邱奔齊齊又致邱是以叔孫州仇如齊謝焉

宋公之弟辰暨仲佗石彊出奔陳

辰以公子地故為二卿所書暨暨者以者以彼及此也夫國君必有左右大臣以輔其政今宋卿大夫或奔曹或奔陳數月之間五人逃去則君孰與處矣蓋宋公寵一向魍而暴虐大臣使骨肉離散相牽而去故書宋公之弟辰暨仲佗石彊出奔陳以譏之辰之勢力能使大臣挾之以去君則其寵任可知矣

十有一年春宋公之弟辰及仲佗石彊公子地自陳入

于蕭以叛

始辰之出奔非其本心為佗疆地所疆故書暨今入
于蕭以叛則惑于三子之言而變其初心故書及始
奔書曰暨恕其不得已也叛而書曰及及猶汲汲然
辰欲之矣蓋君者可貧可賤可殺而不可可使為亂
今辰既出奔又聚合逋逃之徒藉陳之力入于蕭以
叛焉甚矣人心之難于善也今既不能違三子之謀
則其為首惡也何逃殆習見魚石華亥華寧向定之

事而不知其為非也然必曰宋公之弟云者以明宋公寵任之過不能親親以致然亦見辰之本心非有叛意也而三子疆辰以叛與首惡者無差故同書以叛

夏四月

秋宋樂大心自曹入于蕭

春四子入于蕭以叛而宋公不能討至是大心亦入于蕭以從之為其從叛人故不復書叛此五子者大

為宋患由宋公寵以向魋故也然則為人君者豈可偏有所寵哉

冬及鄭平

平六年侵鄭之怨且復著公之叛晉也

叔還如鄭涖盟

魯與鄭盟則是同叛晉矣鄭未來盟而魯往涖盟則魯衰可知又見晉定公霸業衰甚故諸侯多叛

春秋集註卷三十七

欽定四庫全書

春秋集註卷三十八

宋 高閌 撰

定公三

十有二年春薛伯定卒

薛襄公立十三年卒其子比立

夏葬薛襄公

春秋書薛卒者三而書葬者二不日不月略之也且

著其臣子私謚之罪

叔孫州仇帥師墮郈

魯懲侯犯之難以其險固恐為國患故墮之墮邑而至于帥師是邑之力足以抗也前此未有墮邑之事墮邑亂之至也傳以為是時孔子為魯司寇行乎季孫三月不違曰家不藏甲邑無百雉之城于是乎墮郈墮費蓋以墮郈墮費為孔子之功是不然魯以大夫專國政不臣諸侯陪臣專家政不臣大夫上下循

習之所致非一日矣苟欲其不叛在正其本而已矣
諸侯正則大夫正矣大夫正則陪臣正矣何城池兵
甲之患哉惟季孫叔孫不知出此故墮郈墮費所以
譏也而傳反歸功于孔子亦不思之甚矣

衛公孟彊帥師伐曹

諸侯同叛晉而齊不能一之衛之伐曹亦自適已事
而已

季孫斯仲孫何忌帥師墮費

昔者季氏將伐顓臾孔子曰是社稷之臣也何以伐
為冉求曰顓臾固而近于費孔子曰季孫之憂不在
顓臾而在蕭牆之內也今焉費叛豈非蕭牆之內歟
公山弗擾帥費人以攻魯魯人伐而勝之始墮其城
然弗狃之叛名孔子子欲往子路曰何必公山氏之
之也孔子曰夫名我者而豈徒哉如有用我者吾其
為東周乎孔子之意謂天下叛周矣不狃而叛季氏
亦奚足憂而能用我使不狃而興東周是不叛也然

則孔子之旨遠矣仲由所不知也

秋大雩

因旱祭志僭也

冬十月癸亥公會齊侯盟于黃

結叛晉也故謹而日之

十有一月丙寅朔日有食之

日食雖有常度亦人事所召有食之者

公至自黃

以叛晉故危之

十有二月公圍成

天子令行乎天下諸侯令行乎一國故天子未嘗有
伐諸侯者諸侯亦未嘗有伐其國之邑者以其令之
則從也春秋之時天下無王而諸侯擅命故有王伐
鄭之事陪臣擅國而權在私家故有公圍成之事無
復先王之制矣夫先王制國不過千乘都城不過百
雉家富不過十乘以此坊民諸侯猶有叛者今費也

郈也成也三家之邑也魯國之政在大夫故三家越禮各固其城三桓既微陪臣擅命而恃其城數有叛者故三家亦不能制也乃至屢圍而不克遂師帥墮之叔孫既墮郈矣季氏既墮費矣孟氏將墮成而其臣不服至是公親圍之亦不克墮故經書叔孫州仇帥師墮郈季孫斯仲孫何忌帥師墮費而獨書公圍成者著公之弱甚不能墮成也三子能墮郈墮費而公不能墮成則知公室凌夷而政在三子矣為國家

者可不慎于禮哉

公至自圍成

國內而以圍致者魯蓋視成如敵國矣此制國外重之戒也夫君行而至必書法所當爾也然春秋書至或以會或以地或以侵伐蓋以時君輕肆出入無度舉非王命動非民事踰時歷歲宗社無主朝廷無政畏途之中事變莫測故公行凡一百七十有六而書至者八十有二皆危之也隱公當春秋之始天下之

亂未甚故雖有會盟侵伐未嘗致也至桓二年及戎盟于唐十六年會諸侯伐鄭始于此致焉蓋桓公弑君自立敢外交夷狄又助篡伐鄭踰年始還故危之也莊僖會盟最數而無致者時齊侯外攘夷狄內安諸夏屢合諸侯不以兵車故魯君之出無他虞也惟牡丘之盟過三時淮之會踰年故致爾成襄之間齊楚爭霸諸侯日尋干戈故盟會侵伐鮮不致焉及會于蕭魚之後楚雖稍息然中國皆大夫專政魯亦有

三桓之患至有敢逐其君而自廢置者故終春秋之
世公出罕有不致者此雖伐邑亦致焉可謂危亂之
世矣

十有三年春齊侯衛侯次于垂葭

二君以師伐晉而書次于垂葭者與九年次于五氏
同春秋書次者十有三意各有所主不可以例推也
晉至定公于是乎失諸侯春秋崇霸主所以撥亂而
反之正也其意深矣

夏築蛇淵囿

大蒐于比蒲

築蛇淵囿者所以養禽獸以待田獵也今乃蒐于
比蒲則囿何為哉魯既叛晉而三桓至是日懼人之
圖已故數蒐焉

衛公孟彊帥師伐曹

衛比伐曹者曹不叛晉故也靈公志在軍旅之事不
知以禮為國故亟戰如此

秋晉趙鞅入于晉陽以叛

據土背君曰叛鞅殺邯鄲午固有罪矣范中行氏特以姻親之故興師以攻鞅故鞅入晉陽以拒之因興晉陽之甲託辭以逐君側之惡而不知投鼠忌器之義雖曰不要君吾不信也故聖人正名曰叛以著其不由君命而專土興兵之罪然鞅入晉陽由范中行氏始禍不書者亦以入朝歌叛為重故也晉政如此何以主諸侯耶

冬晉荀寅士吉射入于朝歌以叛

二子因攻趙氏幾亂公室鞅既奔晉陽荀躒言于晉侯請皆逐之二子反以兵攻公不勝遂入于朝歌以叛以趙鞅之罪較之則二子之情尤為可恕

晉趙鞅歸于晉

此蓋二子既出晉侯自謂趙鞅保其邑以違荀范之難實非叛者故許之歸也先儒以歸善辭遂遂謂鞅有叛逆而無叛心春秋先正其罪以厲臣節此許其

歸以廣君恩是不然叛者人臣之大惡也脫使鞅所以初入晉陽本拒范中行氏而非有叛君之心然人臣無君命輒據土興兵此豈可赦乎使後世亂臣賊子敢稱兵犯闕以除君側惡人名名而實欲脅君奪權者皆先儒啓之也可不辨乎況衛孫林父亦書歸爾何善之有

薛弒其君比

始志薛故見魯之衰矣稱國以殺者罪在嗣君也蓋

惠公夷嗣立

十有四年春衛公叔戌來奔衛趙陽奔宋

趙陽者公叔戌之黨也戌富而驕衛侯惡之又將去夫人南子之黨反為夫人所愬并其黨逐之此自取之也故以自奔為文

二月辛巳楚公子結陳公孫佗人帥師滅頓以頓子牂歸

頓子欲背楚事晉而絕陳好故楚與帥師滅之不

別以歸何國者明楚陳以滅入國為重而賴子以不
死位為重也陳公孫佗人專兵以助強楚滅諸侯之
國又執其國君歸縱或歸于楚其罪等爾故謹而日
之蓋春秋但從重而論不必見其所歸之國也賴子
見獲故生名之

夏衛北宮結來奔

公叔戌之故也衛靈之無道也沈耳于閨以奔其世
臣又及其所與是以其國聽之也

五月於越敗吳于槁李吳子光卒

敗吳者憂辭也曷憂乎諸夏微而楚張楚微而吳張
吳張而於越爭於越而能敗吳雖曰蠻夷自斃而中
國則可憂也其憂奈何王室不綱霸者不作而蠻夷
交熾諸夏之憂也吳伐越越使罪人詐吳而敗之于
槁李吳子光傷而卒按吳敗六國之師書胡子髡沈
子逞滅此不書吳子光滅何也吳子傷而自卒于陘
非若沈胡二君即死于兵也于是光之子夫差立而

不忘報父讎光亦稱闔閭觀闔閭玩兵滅身亦可以
為殘民滅國者之戒

公會齊侯衛侯于牽

牽衛地三國同救范中行氏兵襲晉而經以會書者
惡其襲霸主也

公至自會

不以牽致三國會故也會則以地致且惡不襲晉也
秋齊侯宋公會于洮

宋亦叛晉矣

天王使石尚來歸脤

古者以脤膾之禮親兄弟之國蓋國之大事在祀與
戎祀有執膾戎有受脤脤者宜社之肉也盛以脤器
故謂之脤以賜同姓之國者所以同福祿也周自王
季子來聘之後王命不復加于諸侯今敬王有事于
社魯未嘗有敵王所愾之功而天王使石尚尚忽為
是舉雖天子損禮之甚是猶有盛王之意也聖人于

周眷眷如此故使使歸脤以見焉曰天子之在惟祭與號而已

衛世子蒯聵出奔宋

蒯聵為南子所譖而出奔春秋不去其世子者著衛侯之罪也南子之惡亦已甚矣其欲害世子之意亦已明矣而靈公信其譖言不亦蔽乎雖然蒯則不能無罪者也其罪奈何人子之處頑嚚則有道矣不至于弑見誣也此亦蒯聵有以致之也

衛公孟彊出奔鄭

比年志公孟彊帥師此衛國用事之卿而靈公疑其
為蒯瞶之黨逐之非其罪也夫衛國一歲之中其卿
大夫凡出奔者五人而衛侯獨與南子處此靈公之
無道也

宋公之弟辰自蕭來奔

辰懼洮之謀來奔魯故復書宋公之弟存其本心所
以罪宋公也

大蒐于比蒲邾子來會公

大蒐皆不書公者非公所主也三家者以公為名而行其私意也下書邾子來會公則知凡蒐狩皆與衆共之雖不言公公在焉可知也然則公狩于郎公及齊人狩于禚皆特書公何也此又專罪公也比蒲之蒐三家之事故特言會公以別之此與莊二十三年蕭叔朝公同蓋未嘗期約因來朝而偶與公為會耳城莒父及霄

公叛晉助范中行氏故懼而城此二邑也此年不書冬無所終也公元年無正至是而著無所終者次年哀受之也

十有五年春王正月邾子來朝

去年所以會公比蒲者欲因來朝正故也邾之微弱可知矣

鼯鼠食郊牛牛死改卜牛

不言食角所食非一處也夫魯不當郊牛死傷廢

郊可也而改卜牛是違天也

二月辛丑楚子滅胡以胡子豹歸

昭二十四年胡為楚伐吳吳敗其師而殺胡子髡于是豹立而背楚遂與諸侯會于召陵以侵楚吳之人郢也胡子盡俘楚邑之近胡者楚人至是滅之而其君歸所謂國必自滅而後滅之也故楚子稱爵而胡子稱名又謹而日之

夏五月辛亥郊

昔者成王以周公為有勲勞于天下命魯公世世祀
周公天子之禮樂是以魯君孟春乘大輅載弧韜旂
十有二旒日月之章祀帝于郊配以后稷天子之禮
也然則魯郊當在孟春今以改卜牛在滌三月故至
五月乃郊非禮可知矣

壬申公薨于高寢

高寢非死所不正其終也嗟乎定公立十五年豈不
欲政自己出權不外奪乎而卒不能者以其愚蔽故

季氏立之爾夫季氏藉祖父之勢僭有國柄一旦制在陽虎僅而脫禍公不能乘其衰微尊任聖賢以自固則公之愚蔽可知矣是時季孫創艾禍難勉用孔子而齊人章章歸其侵疆則公與季氏豈不知聖賢之可以安國而取榮焉卒之齊人歸女樂君臣共觀之遂廢朝事而孔子行蓋公之愚蔽如此

鄭罕達帥師伐宋

齊侯衛侯次于渠蔭

左氏謂謀救宋而不果然其文意乃與五氏垂葭同
邾子來奔喪

天王崩諸侯未有奔其喪者今來奔魯喪可乎特畏
三家之強而求說于魯耳

秋七月壬申妣氏卒

妣氏乃定公之妾而書者蓋以其為哀公之母而以
夫人之禮喪之故也然哀公乃未踰年之君則其行
喪禮不可加于母子未成為君故母亦不隨例稱夫

人

八月庚辰朔日有食之

日食雖有常度亦有事所召有食之者

九月滕子來會葬

此亦畏三桓故爾于定公何有哉

丁巳葬我君定公雨不克葬戊午日下昃乃克葬

安民大慮曰定此臣子之私諡也雨不克葬譏不能
葬也葬不為雨止而不克葬者見無備之甚也義見

宣八年然彼言日中而克葬此言日下昃乃克葬日中則裕于昃矣日下昃則失虞之時甚矣君子之于親不忍一日離也故葬日虞者所以寧親也乃者難乎而之辭乃克葬者所以重孝子之情也

辛巳葬定姒

春秋自成風後妾母皆僭稱夫人譏不正也此不稱小君以子未成君故母亦未成夫人但以夫人之禮葬耳然魯夫人之葬未有加以其君之謚者此妾也

而加以其君之謚非禮之甚也況襄四年葬我小君定姒是襄公之母也又豈可同謚乎

冬城漆

漆非魯邑邾庶其以之來奔者魯受叛人而取其地今將伐邾故又勞民城之以為備譏其非所當城而城也夫國再大喪始葬又勞民如此所謂不待貶絕而罪惡自見者也

春秋集註卷三十八

欽定四庫全書

經部

高氏春秋集註卷三十九

四十

詳校官監察御史_臣徐如澍

給事中_臣溫常綬覆勘

總校官舉人_臣章維桓

校對官員外郎_臣金光悌

謄錄監生_臣吳裕信

欽定四庫全書

春秋集註卷三十九

哀公一

元年春王正月公即位

楚子陳侯隨侯許男圍蔡

楚子以諸侯之師不能伐吳而但圍蔡則楚之衰可

知矣其圍蔡報柏舉也夫蔡侯怨楚不思務本修德

宋 高閌 撰

以俟時而輕謀兵革求得志于大國是益禍也其見報也宜矣定六年鄭滅許以許男斯歸此復見者蓋鄭滅之以爲附庸楚復立之也隨世服于楚不通于中國吳子入楚昭王奔隨隨人免之卒復楚國楚人德之使列于諸侯故聖人因而序于經以見當時蠻夷之專肆如此

鼪鼠食郊角

定公末年哀公元年連書鼪鼠食牛之變則知魯之

郊禮歲一行之餘年皆以常事不書也此不言所食則所傷非一處然牛亦不死也

改卜牛

魯不當郊故天示變以警之而改卜牛是違天也

夏四月辛巳郊

雖改卜牛猶非郊時況公斬然在衰經之中輒行天子之禮以見上帝可乎春秋書郊終于此矣

秋齊侯衛侯伐晉

五氏垂葭之後聖人書次以存晉晉至是而益衰聖人不復以盟主待之矣書曰齊侯衛侯伐晉者見霸統之絕而受諸侯之伐也以傳攷之魯及鮮虞之師在焉春秋以齊衛首惡故沒魯而畧鮮虞也夫范中行氏者晉之卿也叛而不能制又豈能以主諸侯乎無惑乎齊侯衛侯之見伐也蓋晉定公召陵之役不能得楚而蔡昭公以吳子勝于是齊鄭衛背之已而我睦齊鄭宋人效之俱叛晉者也文公之業掃地盡

矣又十有二年而吳人爭長于黃池雖欲爲成景悼
厲之世且不可得矣悲夫

冬仲孫何忌帥師伐邾

觀定公之末邾之事魯至矣去歲邾子來奔喪今踰
年而遽伐之蓋魯人謀邾久矣利取其田不復知有
禮義也

二年春王二月季孫斯叔孫州仇仲孫何忌帥師伐邾
取鄆東田及沂西田

癸巳叔孫州仇仲孫何忌及邾子盟于句繹

定公之薨也邾子來奔喪非能行禮也知三家者欲并其地故事魯不敢不恭此其情也然卒不免故元年伐邾至是三卿同伐而取鄆沂之田此三家之意也且襄十九年取邾田自鄆水今三卿又帥師伐邾取鄆東田因及沂西田然則三卿之專強貪暴如此故列數之以重其罪入春秋來伐國取邑者多矣未有伐國取田者也襄十有一年作三軍則魯公之民

歸于三家矣尚有中軍爲公之肘腋也昭五年又舍
中軍則魯公肘腋之兵盡歸于季氏矣故昭公見逐
凡八年而後死于外國定公既立不能誅季氏反聽
其邪說淫于女樂而退孔子幸而終于位者非季氏
不欲取其位也諸侯服周公之德而尊其後嗣三家
雖有無君之心而畏諸侯之義也當哀之時祿去公
室蓋五世矣三家盡分魯國之土而兵其民專其賦
故書曰季孫斯叔孫州仇仲孫何忌帥師伐邾是三

卿各專其師同伐乎邾也句繹邾地故爲小邾所取
三家既得田遂許受其盟故書及以罪之然三卿伐
而二卿盟者季孫臨之叔仲欽之是季孫之汰也自
謂猶君矣其卑邾亦甚矣故謹而日之是時魯政不
復在公矣皆三家者之所爲也故詳志之

夏四月丙子衛侯元卒

衛靈公立四十二年時世子蒯聵以南子之故出奔
在外南子怨之不召乃立蒯聵之子輒是謂出公

滕子來朝

公新立故也此見滕之微弱尤甚矣

晉趙鞅帥師納衛世子蒯瞶于戚

戚衛邑也子受命于父臣受命于君蒯瞶雖奔靈公
未有廢之之命雖嘗欲立郢亦不果也今靈公卒衛
人以世子在外遂立其子輒使輒知己之所以得立
者以父爲世子故因逆其父而還以位則子道得而
亂皆息矣奈何更待人納其父而反拒之耶凡奔者

在外非有國逆不可入故趙鞅帥師納之其言納衛世子者明所納者正也異乎趙盾納捷菑于邾而貶稱人也其言于戚者見衛已立輒矣蒯賁爲輒所拒而不得入於衛也聖人惡輒貪國叛父逆亂人倫以滅天性故方其適衛也衛子待子以爲政子路問之子曰必也正名乎于是孔子不得政嗚呼孔子而得政必將復世子矣奈何雖由而亦以爲迂耶國人于是拒世子曰先君之命也豈知君子之于國也雖其

先君之命苟爲非義君子不從也然輒已立矣將若
之何曰曉輒而後立世子不遂先君之失而父子定
不愈于爭乎爭則刑罰不中而民無所措手足故君
子名之必可言也言之必可行也今輒以世子之子
得立反拒世子蒯瞶稱世子而反不得立得爲正名
乎由此言之蒯瞶廢則輒不當立輒立則是蒯瞶不
當廢故輒當致國于蒯瞶豈可以子拒父也聖人于
蒯瞶出入皆正其世子之名所以篤父子君臣之大

經也不然貪國叛父之人接踵于萬世矣

秋八月甲戌晉趙鞅帥師及鄭罕達帥師戰于鐵鄭師

敗績

齊人輸范氏粟鄭罕達送之晉趙鞅遇鄭師于鐵而
與之戰故書晉及而不書伐特以兩國之卿自帥師
共戰爲文也書鄭師敗績者善晉勝也晉雖失道而
藉文襄悼公之遺烈天下猶忻嚮焉是以晉一有勝
則君子喜而存之庶幾復振此憂世之仁也

冬十月葬衛靈公

七月而葬父子爭國故也因魯往會而著其臣子私謚之罪

十有一月蔡遷于州來蔡殺其大夫公子駟

吳滅州來而蔡已降于楚復背楚而請遷于吳吳人許之故以自遷為文今壽春府下蔡縣是其地也初武王封叔度于汝南上蔡蔡叔以叛被誅成王復以封其子仲焉及平侯卒徙于新蔡至昭侯乃徙九江

下蔡卽州來是也州來本屬楚蔡以畏楚求遷而反
遷于楚地故國人皆不欲遷吳人怨其不時遷而以
兵襲之故蔡人以駟本謀遷因委罪于駟而殺之所
以先書蔡遷後書殺駟也夫蔡之禍生于玩裘而成
于遷國人無遠慮必有近憂豈謂是耶吳楚之貪殘
無道則又何誅焉

三年春齊國夏衛石曼姑帥師圍戚

春秋書國外邑則各繫其國今齊圍衛之戚何以不

繫之衛主曼姑也主曼姑則何以齊爲兵首以曼姑之義不可圍也先儒乃以輒之拒父爲尊祖以齊國夏衛石曼姑之圍戚爲霸討嗚呼起後世亂人倫賊父子之教者蓋此言也且蒯瞶不過以疑似之迹奔逃于外以待父之察爾父子之恩未絕也輒爲蒯瞶之子豈不知之況人子之事親當致之于無過之地今見蒯瞶出奔在外而遂以其父爲罪人則輒之爲人子已不免乎罪矣况又據國而拒其父乎昔孟子

論舜爲天子臯陶爲士瞽瞍殺人則如之何曰執之而已矣然則舜如之何曰舜視棄天下猶棄敝屣也竊負而逃遵海濱而處終身忻然樂而忘天下斬之爲人子能致其親于無過之地若此可也今反以已之大夫會外大夫帥師以圍其父則君臣之義父子之恩皆自此絕矣夫曼姑以臣圍君爲子圍父逆亂人倫莫甚于此天下豈有無父之國哉不待貶絕而罪惡可見齊國夏帥師以助之故特重其罪以爲惡

首且齊既與晉爲仇若薊賸入則衛從晉矣此齊人所以助輒也

夏四月甲午地震

地道安靜以震爲異故謹而日之

五月辛卯桓宮僖宮災

諸侯五廟親盡則毀桓僖何以不毀三家者存之也僭天子也三家者出于桓而立于僖故私之也聖人因其災而並錄之是時三桓子孫方盛君子于是乎

知有天道也不書及者不嫌乎一處也若雉門兩觀則不可不書及矣

季孫斯叔孫州仇帥師城啟陽

魯懼晉故城啟陽爲之備以所城近穀故帥師焉二卿帥師有所畏也自是連年四城

宋樂髡帥師伐曹

曹本屬宋既而叛之適足以取亡而已矣

秋七月丙子季孫斯卒

此意如之子季桓子也庶子肥嗣是曰康子夫君之
視臣如手足則臣之視君如腹心君之視臣如犬馬
則臣之視君如國人君之視臣如土芥則臣之視君
如寇讎蓋君之遇之也重則其報之也亦重君之遇
之也輕則其報之也亦輕春秋之時君遇臣之禮不
止于薄也或專放之殺之矣臣事君之道不止于欺
也或敢逐之弑之矣聖人痛君臣之兩失也故于魯
大夫書卒者三十不卒者十有七蓋小見其意焉非

特記君恩之厚薄臣之終始也其書卒者或親臨之
或賻贈之恩及之也其不書卒者或出奔或不親臨
或賻贈不加恩意不及亦或卒于春秋之後也如公
子翬弑逆也慶父僑如臧孫紇公子慙皆出奔者也
其他或恩不及或在春秋之後

蔡人放其大夫公孫獵于吳

公子駟之黨也放大夫者國也而稱人者皆衆人逐
之放有罪也其放之于吳是召亂之道也厥後蔡亂

以公孫氏豈獵之黨歟

冬十月癸卯秦伯卒

秦惠公也詳志日月見恩禮之厚也其子悼公嗣立
叔孫州仇仲孫何忌帥師圍邾

邾子已受盟于句繹今二卿踰年而渝之是自敗其
盟也雖邾政不修有以致寇然魯之棄信亦已甚矣
自是盟不足恃春秋弗志也

四年春王二月庚戌盜殺蔡侯申

宣十七年蔡侯申卒是爲文公此蔡侯申于文公爲
曾孫豈有曾孫與曾祖同名者乎周人以諱事神必
有一誤此蔡侯申將如吳諸大夫恐其復遷也公孫
翩逐而射之入于家人而卒國君未有爲盜殺之者
此書盜殺見變亂之極也公孫翩者又何足錄哉故
直書盜以絕之而不曰弑其君蓋絕無臣子之義故
不列于君臣又甚于閹者所以恕蔡侯而深惡夫弑
君之賊也申立二十八年其子朔立是爲成公

蔡公孫辰出奔吳

蔡人以其盜黨逐之而不殺故以自奔爲文其奔于吳者以公孫獵在焉

葬秦惠公

因魯往會而著其臣子私諡之罪

宋人執小邾子

天下無霸強得凌弱故宋得以執國君而無所忌者蓋闕霸也執非其罪所以貶而人之

夏蔡殺其大夫公孫姓公孫霍

皆盜黨也其黨或奔或殺則知弑君之盜已得矣

晉人執戎蠻子赤歸于楚

據左氏楚人圍蠻氏蠻氏潰蠻子赤奔晉晉人僞卜

裂田以予蠻使蠻子聽卜遂執之以畀于楚師夫諸

侯有罪方伯合命于天子問其罪然後執而歸于京

師正也諸侯有罪不請王命而執之歸于京師罪尚

可容若晉人執衛侯歸之于京師是也諸侯執諸侯

以畀諸侯其罪尤重若晉侯入曹執曹伯畀宋人是也今晉爲中國盟主而執戎蠻子苟得其罪則獻之天子猶之可也今既專執之反歸于楚以君臣言則楚爲君矣以強弱言則楚爲霸矣舍周事楚不足主中國之諸侯矣此晉所以不足與而諸侯皆棄之也

城西郭

城其西之一面以備晉故役民力也

六月辛丑亳社災

周自克商之後凡封建諸侯皆使立亳社顏師古曰
存其社者欲人君常思敬慎懼危亡也董仲舒劉向
亦云亡國之社所以示戒也左氏襄三十年傳曰或
呌于宋太廟曰嘻嘻出出鳥鳴于亳社如曰嘻嘻然
則諸侯皆立亳社矣閔二年傳曰間于二社爲公室
輔杜預謂二社者周社亳社之兩間朝廷執政所在
也凡亡國之社必屋書亳社災見其不知戒故謹而
日之

秋八月甲寅滕子結卒

冬十有二月葬蔡昭公

國亂故緩也春秋于定哀之際錄昭公尤詳者哀其不幸也當齊桓晉公之隆蔡猶不能自拔楚楚凌夷至于末季而昭公乃銳然合中國以興召陵之會卒能以吳破楚入郢此其志力有過人者遭晉德之不競而不能遠撫使之卒陷于楚之禍君子是以哀昭公之不幸而爲之數見于經也使昭公出于晉悼之

世其功烈當如何哉

葬滕頃公

因魯往會而著其臣子私諡之罪

五年春城毗

夏齊侯伐宋

伐宋者以求宋也求宋者何晉侯失霸宋人闕之齊人爭之是以伐而求之得宋則霸可圖矣

晉趙鞅帥師伐衛

衛不受蒯賸且助范中行氏故也

秋九月癸酉齊侯杵臼卒

齊景公之不霸也有由哉晉以君臣興兵而齊乃爲臣伐君衛以父子爭國而齊乃爲子圍父以是令于諸侯是以君子知齊景之國之將亂也景公立五十八年其世子蚤死及疾屬陳乞立其少子荼于是羣公子皆出奔而公子陽生來奔魯不書若非以罪出故也

冬叔還如齊

使卿弔且會葬非禮也

閏月葬齊景公

喪不計閏其以月數者計閏可也因魯往會而著其臣子私謚之罪

六年春城邾瑕

是年冬伐邾明年遂入邾則知邾益微弱魯以不義強城之也聖人因其城而復繫之邾者不與魯之擅

并人之土地也

晉趙鞅帥師伐鮮虞

鮮虞納荀寅于柏人故趙鞅伐之治范中行之亂也
吳伐陳

陳楚與也吳之入楚使召陳侯不來吳人怨之今伐
陳者修先君之怨也聖人惡吳人侵暴中國故狄之
而陳自是與吳成

夏齊國夏及高張來奔

二子從先君之亂命廢長立少既又不能全其嗣君而陳乞將立陽生故先出奔夫二子以國難不勝而出與他奔異矣然不死君難故亦書出奔以示貶

叔還會吳于柵

叔還聘于吳吳子自伐陳還至柵而叔還遂致命焉故以會書

秋七月庚寅楚子軫卒

此楚昭王也昭王委政囊瓦寵費無極使賢人誅戮

諸侯怨畔入郢之禍宮汙冢發幾不免其身迄得反國而卒于位者國有一申包胥也凡立二十七年其庶子章立書楚子卒義見宣十八年

齊陽生入于齊

陳乞使召陽生于魯將立之不書自魯者魯無助也繫陽生于齊而不稱公子者與小白同義且見景公廢長立少以啓亂也昔景公問政于孔子孔子對曰君君臣臣父父子子聖人之意深矣

齊陳乞弑其君荼

陽生入而君遇弑弑君者雖朱毛而陽生實與聞乎
弑也不以陽生首惡者陽生之入陳乞召之荼之遇
弑陳乞爲之以乞爲首惡則陽生之罪自見不然則
陳乞廢立之迹不明而後世奸臣得以肆其詐矣故
春秋書弑君之賊雖其人不爲必以禍所從發爲
主所以誅其意也然觀從召公子比而靈王死陳乞
召陽生而荼死乞蒙弑君之惡而從乃委罪公子比

何也從陪臣也能始禍而不能定其所立比以衆立而不顧其君是比弑之也乞大臣也齊已有君而又外求陽生雖入而不能自定其位乞以強立之而不顧其君是乞弑之也從雖召比然公子有三焉比不自立可也乞召陽生固將君之矣陽生爲君則孺子荼安所置哉故春秋別嫌明微不以其迹似而同其誅非天下之至公孰能預于此

冬仲孫何忌帥師伐邾

魯人必欲滅邾而後已自公即位以來四書邾役積
明年入邾之亂也

宋向巢帥師伐曹

樂髡伐之猶未服且爲入曹起也

春秋集註卷三十九

欽定四庫全書

春秋集註卷四十

宋 高閌 撰

哀公二

七年春宋皇瑗帥師侵鄭

晉衰齊亂故宋公闚霸也不務德而加兵于人非霸主之義故學侵以譏之

晉魏曼多帥師侵衛

衛侯棄其父至今六年矣猶未納也晉不以此致討而以范中行氏故加兵于衛故書侵以譏之

夏公會吳于鄆

吳欲霸諸侯公親往會之遂徵百牢魯人以吳爲棄禮必不能霸然其徵令無度乃兵至之兆也可不戒哉會吳不致不專以夷狄危公也會大夫伐小國亦如之

秋公伐邾

是時邾已服于吳矣公反自鄆以吳爲無能爲也季孫因請伐邾公弗能禁故直書公以示貶

八月己酉入邾以邾子益來

邾入春秋之始自儀父與魯盟會結好凡二百四十年矣今不明過之在我君臣更伐之至于四至于五取田取邑亦云極矣終入其國又執其君以歸雖因其國之漸衰然公一闔閭也春秋隱君之惡故伐人書取婉而成章而不失其實也恃強陵弱無故伐人

而入其國處其宮晝夜掠以其君來獻于亳社囚于
負瑕此天下之惡也吳師為是克東陽齊人為是取
我二邑辱國亦甚矣何以備書于策況仲尼躬事哀
公未嘗不盡禮焉曷不少為我君隱乎聖人不以無
過為美而以能改過為美故于人之有惡苟務去之
而不積則亦不念其惡而進之矣書伐邾書入邾書
以邾子益來是天下之惡也及其歸邾子益于邾則
是知其為惡而能去矣故于此詳著之而不少隱

者乃所以欲見厥後歸邾子之能去其惡而與之也
聖人之情見矣明此然後可以操賞罰之權矣邾子
以見獲故名之不言滅者諸大夫請救于吳吳爲之
伐魯而公遂歸邾子故也不言以歸而曰以來者內
外之辭也不書至者以邾子益來則公之至可知矣
宋人圍曹

曹伯奸宋是以致討然宋之伐曹數矣今又圍之亦
已甚矣故貶人人之先儒謂將卑師少稱人按經稱

人以圍國者凡十有一若皆將卑而師少又豈能圍之乎明年書宋公入曹則知此書人者乃貶之也

冬鄭駟宏帥師救曹

鄭與曹疎矣此所以救曹者非志于義也欲報皇瑗之師也疾宋也

八年春王正月宋公入曹以曹伯陽歸

此滅曹也而不書滅滅者亡國之善辭上下之同力也據左氏曹伯背晉奸宋宋公伐之將還曹人言之

公聞之怒遂命反師滅曹執曹伯以歸焉然則宋公
非有志於滅曹而曹自滅之也故此書宋爵又止稱
入而已所以罪曹人輕怒以亡其國也

吳伐我

邾子請救於吳故此年吳來討焉嗟乎公入人之國
俘人之君以致吳師之來討見公不能處已絕亂矣
不曰伐我某鄙而直云伐我者吳師加魯國都而盟
于城下是以聖人深恥之故沒而不書也

夏齊人取讙及闡

邾嘗屬齊而益又齊之甥也魯入邾而以其君益來
遂致齊人亦怒于是賂齊以說之凡內失邑不書蓋
不能保其土地人民辱孰甚焉故沒之也若已與之
彼以背義而受則書取此年齊取讙闡及宣元年取
濟西田是也

歸邾子益于邾

益齊甥也齊侯使如吳請師吳方圖霸亦受邾人之

愬而謀伐我故公懼其復來乃歸邾子以紓國難雖
非公之自能悔過遷善然亦因敵國外患而知警懼
思變也以此見國君造惡不悛則四鄰謀取其國家
莫能自保苟去惡而不積則四鄰不侵其封境自安
矣春秋前書伐邾次書入邾又書以邾子益來不少
爲我君隱者以明歸益之能掩其前惡而美之也

秋七月

一時無事書首月存天道王法也

冬十有二月癸亥杞伯過卒

杞僖公立十九年其子維立是爲閔公

齊人歸讙及闡

公既歸邾子益于邾故齊人歸讙及闡前書取逆辭也此書歸順辭也去逆效順息爭休兵齊無取地之罪魯無失地之辱斯可謂善變矣然不云歸我者公既歸邾故齊亦歸讙闡非以爲惠也上既書取則知此必歸魯故亦不書來

九年春王二月葬杞僖公

三月而葬簡也史記杞悼公卒子隱公乞立七月隱公弟遂弑隱自立是爲僖公然則僖立不正而春秋于葬不少貶者見世亂如杞僖尚且得葬則諸侯無不葬者矣

宋皇瑗帥師取鄭師于雍邱

取易辭也師而易取則鄭病矣鄭罕達之屬有許瑕者求邑而無以與之遂越境而圍其邑斯用師爲利

而不以義自取喪師之禍故書取以惡鄭也春秋以是爲帥師之戒

夏楚人伐陳

秋宋公伐鄭

報雍邱也稱爵稱伐以惡鄭也

冬十月

一時無事書首月存天道王法也

十年春王二月邾子益來奔

吳恃歸益之功而恣爲不道而益亦不能嗣守先業
上下乖離國人不君吳人討而囚之乃使其大夫奉
其太子華以爲政故稱名以絕之且先爲魯所獲而
又來奔其不知恥甚矣

公會吳伐齊

吳欲求霸怒齊不服故伐之公會強吳伐親鄰之國
是助吳爲虐而致齊之亂也是時中國無主之甚蓋
自是春不書王矣

三月戊戌齊侯陽生卒

八年齊侯請吳師伐魯既而取魯之賂而辭吳吳子
怒反與魯伐齊齊人弑悼公赴于師吳人乃退夫悼
公之立非齊人之志非衆大夫之謀特陳乞詐其國
人誣其大夫而劫立之雖殺孺子誅鮑牧大夫國人
猶莫之肯君故因兵難而弑之齊人共立其子壬是
爲簡公

夏宋人伐鄭

去年春取鄭師而秋又伐之今雖復有辭于伐而聖人惡其瀆兵不已故貶而人之

晉趙鞅帥師侵齊

齊率諸侯以貳晉可以討矣然趙鞅加兵于有喪之國雖討得其罪聖人弗予也故書侵以譏之異乎士句矣

五月公至自伐齊

齊與魯接境而公會強吳伐之致齊侯之遇弑今既

聞其喪則遂班師可也其所以久而歸者公之進退制在吳故也

葬齊悼公

不及五月而葬簡也以公會吳伐齊故齊弒君以說公雖不廢喪紀往會其葬不足以贖其過故承上文言之且著其臣子私謚之罪

衛公孟彊自齊歸于衛

公孟彊以蒯賸之黨見逐晉納蒯賸齊助出公而反

納彊則知逐非其罪矣始彊奔鄭自鄭奔齊至是遂假齊之力以歸焉

薛伯夷卒

不書日史闕文

秋葬薛惠公

冬楚公子結帥師伐陳

陳即吳不服楚故再伐之

吳救陳

此與狄救齊同義所以罪中國諸侯也蓋陳背中國而即楚又背楚而即吳故致楚師來伐則吳之救之非真能行義也故不稱師亦不稱子直曰吳而已

十有一年春齊國書帥師伐我

夏陳袁顥出奔鄭

紫經文公羊作袁顥左氏穀梁作轅顥此從公羊

袁顥爲陳司徒取于民無制國人怨而逐之故以自奔爲文

五月公會吳伐齊

會者外爲主吳劫之也公非得已也

甲戌齊國書帥師及吳戰于艾陵齊師敗績獲齊國書
公因齊國書之見伐乃再會吳伐齊而戰于艾陵不
書公者沒公乃所以貶公也且書及吳我師戰于艾
陵不可也書及公吳戰于艾陵不可也先言公會吳
伐齊繼書及吳戰則公預其貶可知矣公與強吳伐
中國不可與強吳同貶又不可以大夫敵公故微其
辭而獨出公也其書及書獲則罪國書也與宋華元

同然華元生獲而國書死獲故公使太史固歸國子之元也國書復繫以國者與宋華元皆以國事見獲也

秋七月辛酉滕子虞母卒

滕隱公立七年

冬十有一月葬滕隱公

因魯往會而著其臣子私謚之罪

衛世叔齊出奔

孔文子以齊淫而欲攻之故齊出奔宋春秋書內外
大夫出奔者凡五十有八蓋君之股肱治亂所寄故
重以書之然春秋之末何其出奔之多也是時政在
大夫各欲自專故始則相猜相忌終乃相攻相逐也
十有二年春用田賦

譏重歛也田者井田也賦者財賦也宣公奢泰始什
二而稅至于哀公則又甚焉既什二而稅其田又什
二而歛其財故書曰用田賦言用田以爲財賦之率

也民到于今受其患

夏五月甲辰孟子卒

此昭公之嫡夫人吳女也記曰夫人之不命于天子
自魯昭公始昭公欲結好彊吳以去三家之權因娶
于吳以吳同姓不敢請命于天子而謂之吳孟子當
是時大臣不能匡救國人不以爲非而昭公乃知避
其名不敢請命于天子是猶能改過也故孔子以爲
知禮而春秋亦因其實而書之曰孟子卒而已孟子

于哀公爲祖妣不夫人不薨不葬不祔廟著哀公之
忍也觀季氏于昭公之葬尚欲溝而絕之況其所娶
同姓之女乎故春秋但書孟子卒而魯國臣子之罪
可見矣雖周道親親百世而婚姻不通而昭公既已
尸其過矣爲之子孫者豈忍絕之哉然則如之何曰
倣諸仲子別考宮焉庶乎其可也

公會吳于橐臯

尋鄆之會

秋公會衛侯宋皇瑗于鄆

此爲吳故也按會衛宋于鄆者不與公之會所以外吳于中國也亦所以存內也

宋向巢帥師伐鄭

宋平元之族自蕭奔鄭鄭人爲之城郛以處之于是向巢伐鄭而圍郛

冬十有二月螽

建亥之月不宜有螽此著魯歷不得其正也

十有三年春鄭罕達帥師取宋師于岳

宋師之在岳也不設備鄭罕達因宋師之不戒而取之亦以報九年雍邱之役也二國覆師以相償報惡孰甚焉然則出師而不設備者皆棄師之道故春秋著之爲伐國者之戒

夏許男成卒

許元公立二十二年其子結立是爲悼公

公會晉侯及吳子于黃池

黃池之會書公會晉侯及吳子者主在吳子也黃池之會不主晉侯而主吳子者晉侯不能主諸侯故也吳自柏舉之戰勢橫中國諸侯大小震慄皆宗于吳晉侯不見者二十四年此不能主諸侯可知也元年書齊侯衛侯伐晉見霸統之絕已受諸侯之伐故黃池之會吳子主焉不言公會吳子晉侯者不與吳之主中國也不與吳之主中國者存中國也故以晉侯及吳子爲文稱吳之爵所以見中國之衰書晉之及

所以抑強吳之橫春秋謹嚴其義甚微故首止先及而後會所以尊王世子黃池先會而後乃及所以外吳子也按吳自定四年入郢哀六年伐陳夏叔還會吳于柤七年公會于鄆八年伐我十年公會伐齊十一年公又會伐齊十三年公會于橐臯皆曰吳以狄之此稱子者復與其爵也夫吳乃泰伯之後與周同姓雖用夷禮而數爲中國伐楚所以伸中國而攘楚者其功甚多此宜春秋之所予而春秋與楚同貶者

以其狂僭大號擾亂中國與楚同也夫天無二日民無二王楚以蠻夷而僭稱王罪不容誅幸齊桓晉文相繼抑之是時齊桓晉文雖主夏盟而以中國諸侯之故猶知有周王在焉今吳乃爲黃池之會以主盟中國是二王也將置周王于何地耶聖人自十年吳伐齊之後春不書王以見天下之無王此春秋之所
以作也

楚公子申帥師伐陳

楚畏吳之強無如之何故乘吳子出會而伐陳也

於越入吳

吳方爲黃池之會爭權上國而於越又乘其無備而入之自是吳不復振而越亦僭號稱王遂入于中國而天下淪胥不復知有周室矣原周之衰自幽厲失道王綱紊亂而禮樂征伐猶出于天子諸侯畏周之威不敢肆也及平王東遷王室不競諸侯國自爲政周道凌夷等于列國迨隱之世習之成俗而楚遂僭

竊王號無所忌憚然而文武成康之德猶在民未忘周也故齊桓晉文相繼而起莫不秉大義以攘夷狄而尊王室其盟會征伐必以王命爲首諸侯順之者存逆之者亡世雖無王而法猶立故春秋推王法以絕之以天下猶知有周也及定哀以來齊晉既衰政出于大夫吳楚橫行于中國以勢力相吞滅自於越入吳之後吳楚又衰夷狄愈橫禮義無可復施政刑無所復加諸侯習于凶亂不可告語靡然入于戰國

不復知有周而皆自稱王矣故春秋因西狩獲麟而止焉冬田曰狩而周之正月二月皆冬也明年止書春西狩獲麟而不具夏秋冬則秋會于黃池之歲乃春秋之所終也故何休曰獲麟于春而言狩者去周之正而行夏之時也

秋公至自會

吳主會故書至以危之

晉魏曼多帥師侵衛

蒯賁在戚今有十二年矣晉人不能以此致討于衛
以范中行故而數興師故書侵以罪之公羊作晉魏
多與仲孫忌同義

葬許元公

因魯往會而著其臣子私謚之罪

九月螽

周之九月夏之七月也其爲農災又非冬十有二月
之比也

冬十有一月有星孛于東方

不言宿名者董仲舒劉向以爲不加宿也文十四年
有星孛于北斗昭十七年有星孛于大辰皆言所次
而此獨不言則不加宿可知也蓋著人事所召自是
周家業業墜地矣

盜殺陳夏區夫

夏區夫徵舒之後也徵舒弑君楚子殺之而陳人
猶使世執國政故春秋因其爲盜所殺而書之與華

孫同意凡書盜者以人皆可得而執之也盜殺蔡侯
申盜殺陳夏區夫當春秋之季世變之甚至于盜興
而專殺國君卿大夫則亂已極矣

十有二月螽

去歲十有二月螽今年九月螽十二月又螽則爲災
甚矣而明年春乃獲麟豈不怪哉

十有四年春西狩獲麟

麟者和氣之所致治世之應也曰見曰來乃爲瑞爾

因狩而獵得之則混于禽獸之中同爲虞人之所驅
斯麟之出不遇時矣曰獲云者悼之辭也孔子卒于
獲麟之後二歲則是時孔子已老故感以作春秋而
絕筆于此一句也以因感而作故因以此終焉然而
麟使不獲聖人豈遂無意于天下後世乎黃池之會
乃聖人作春秋之所終也何以知黃池之會乃春秋
之所終前此猶可言也後此則不可言也夫惟不可
言此春秋之所以終也何者天子失政自東遷始前

此猶可言黃池之會晉魯在焉後此不可言者諸侯
泯泯制在強國無復知有周室矣聖人爲是作春秋
深有望乎天下後世苟有王者作能舉吾春秋之法
以拯天下之民此春秋之所終而孟子深得仲尼作
經之旨故以王道游于諸侯而終不入于秦楚吳越
也

春秋集註卷四十